



Republika e Kosovës
Republika Kosova – Republic of Kosovo



Komuna e Mitrovicës së Jugut
Opština Juzna Mitrovica – Municipality of Mitrovica South

KUVENDI I KOMUNËS SË MITROVICËS SË JUGUT
Nr. 02-060/01-0015247-1/24 dt. 12.03.2024
Mitrovicë

PROCESVERBAL
Nga mbledhja e 29-të e rregullt e Kuvendit të Komunës

Koha: 12.03.2024 ora 10:00

Vendi: Salla e mbledhjeve të Kuvendit të Komunës

Të pranishëm: Anëtarët e Kuvendit: Vesa Broja, Shkëlqim Ibrahim, Fisnik Suma, Majlinda Kurti, Xhafer Preteni, Lavdim Zeneli, Florina Çitaku, Fadil Veseli, Hamdi Hasani, Mentor Vinarci, Nazmije Sejdiu, Egzon Hamza, Nafije Rexha, Hysen Muzliukaj, Kushtrim Zeneli, Naser Muja, Jeton Zeneli, Armend Begu, Ekrem Sadiku, Erseka Barani, Elidiana Budini Haziri, Xhyljeta Imeri, Flutura Beka Kamberaj, Gazmend Asllani, Muhamed Hoti, Oltion Ahmeti, Jeton Ujkani, Vesel Neziri, Ardita Aliu dhe Gjergj Beka

Kryetari i Komunës z. Bedri Hamza

Nënkryetari i Komunës z. Arian Tahiri

Drejtorët e Drejtorive

Përfaqësues të Shoqërisë Civile

Mediat

Mungoi: Fisnik Krasniqi, Faruk Mujka, Sevdaim Uka, Shkurta Shosholli Musa dhe Xhevrije Bahtiri Ademi

Mbledhjen e hapi dhe kryesoi Kryesuesja Kuvendit znj. Vesa Broja, e cila fillimisht përshëndeti Kryetarin e Komunës, anëtarët e Kuvendit, mediat dhe të pranishmit tjerë. Kryesuesja Kuvendit në vazhdim theksoi se zbatim të nenit 43, të Ligjit Nr. 03/L-040 Për vetëqeverisje lokale; nenit 3, paragrafi 1, nën paragrafi 1.2, dhe nenit 5, të Udhëzimit Administrativ (MAPL) Nr. 02/2015 për mbajtjen e mbledhjeve të Kuvendit të Komunës; nenit 50, paragrafi 1, nën paragrafi 1.2, dhe nenit 52, paragrafi 1, të Statutit të Komunës ka thirrur mbledhjen e 29-të të rregullt të Kuvendit të Komunës me rendin e ditës të paraparë me thirrje.

Hap diskutimin.

Kryetari i Komunës z. Bedri Hamza: Përshëndetje për të gjithë juve! Më lejoni që edhe unë t'ju uroj muajin e shenjtë të Ramazanit juve dhe të gjithë qytetarëve të Mitrovicës. E kam një lutje, pasi që kam një takim në Prishtinë, nëse ka mundësi që pika katër e rendit të ditës të zhvendoset dhe të jetë pika e dytë e rendit të ditës.

Kryesuesja znj. Vesa Broja: Atëherë pika e katërt e rendit të ditës: Plani i punës së kryetarit të Komunës për vitin 2024 të zhvendoset si pikë e dytë e rendit të ditës dhe pikat e rendit të ditës mbesin të njëjta.

Ekrem Sadiku: Përshëndetje për gjithë, kam një propozim për një pikë të rendit të ditës, seancat e kaluara kemi diskutuar së paku nja dy herë në lidhje me mos kompensimin e dëmeve të shkaktuara nga vërshimet për disa familje, është fjala për vitin e kaluar. Andaj unë sot pas

konsultave të cilat kam pas me disa nga asamblistët, përfshi këto edhe asamblistët e PDK-së, kam ardhur me një propozim, ku t'i ndajmë disa mjete për këto familje, edhe pse unë paraprakisht dhe pjesa dërmuese e asamblistëve këtu kemi pritur që do të na vijë një raport prej komisionit për me pa se çka ka ndodhë me ato familje, e cila ka qenë vlerë e dëmit dhe pse nuk janë kompensuar. Mirëpo këtë ne nuk e kemi pranuar, prandaj sot kërkoj që bashkërisht të ndajmë një shumë solide për ta dhe kështu që t'ju dalim në ndihmë atyre, për shkak se si ne nuk po e dimë se çka ka ndodhur, vetëm e dimë se kanë mbetur anash edhe pse kanë qenë të dëmtuar nga vërshimet.

Kryetari i Komunës z. Bedri Hamza: Do të thotë qysh ju jeni e keni këtë informacion, po ashtu edhe unë kam një informacion që disa familje kanë mbetur pa u kompensuar. Ne e dimë që është vendim prej asamblesë komunale që niveli i kompensimit për secilën familje që ka pësua nga vërshimet të jetë në nivel të 2.500€. Vetëm proceduralisht do të thotë, a mundet me krye komisioni i kaluar këtë punë sepse besoj që të gjithë na jemi të interesuar që çdo familje që ka pësua nga vërshime të jetë e kompensuar. Nuk kemi nevojë kur është kompensua pjesa dërmuese e tyre dhe disa prej tyre të mbesin pa të drejtë pa u kompensuar. Po ashtu edhe komisioni të vie me një vlerësim të ri në Kuvend, që këto janë familje të cilat kanë ngelë të pa kompensuara dhe propozohet edhe të merret vendim për kompensimin e këtyre familjeve, lartësia duhet me qenë e njëjtë, se s'mundem me bo dallime. Sa i përket mjeteve, sigurisht se ne kemi mundësi financiare me modelua zgjidhjet e pranueshme për këtë punë edhe me u bë kompensimi i tyre. Mirëpo mendoj që duhet të krijohet një komision, i cili e bën verifikimin e numrit dhe të familjeve, të cilat kanë mbetur të pa kompensuar dhe ky do të jetë një raport i atij komisioni. Por nëse ka dikush ndonjë propozim pak ma ndryshe, le të na e thotë pse jo?

Ekrem Sadiku: Natyrisht që unë në parim pajtohem, dhe për këtë edhe kemi kërkuar që kjo të jetë si procedurë fillestare që mos të bëjmë ndonjë gabim në procedura, dhe që mandej të na e kthej MAPL dhe të mos bëhet asgjë. Por unë çka po kërkoj prej juve kryesueses dhe prej ekzekutivit është që të merret një hap tutje dhe të shohim se cilat janë modalitetet, ndoshta ka mundësi që të krijohet një tjetër komision, apo edhe Zyra Ligjore në kuadër të ekzekutivit, e cila mund të na japë një sqarim.

Kryesuesja znj. Vesa Broja: Unë po besoj që është çështje e kryetarit dhe ekzekutivit formimi i komisionit të ri, po ashtu edhe verifikimi me komisionin e kaluar se a janë kompensuar, dhe pse s'janë të kompensuar ata persona të cilët është dashtë të kompensohen. Po ja kalojmë fjalën drejtorit për një sqarim.

Bahtir Maxhuni: Është e vërtetë që disa qytetarë kanë mbetur pa u kompensuar për dëmet nga vërshimet, për të hy në zanafillë dhe të tregojmë se pse kanë mbetur pa u kompensuar, z. Sadiku, por nëse dikush dëshiron mundet me ardhë në zyrë tek unë edhe komisionin do ta thërrasim dhe do ta sqarojmë saktë. Nuk mendoj se ka nevojë të formohet komisioni i ri, por komisioni i cili është dalë në teren dhe do të bëjnë një rivlerësim për arsye se ngjarjet në teren kanë ndryshuar, dhe se arsyeja kryesore është se kërkesat i kanë bërë me vonesë. Kam qenë në kontakt me qytetarët, po ashtu në zyre i kam pasur disa herë në takime dhe jemi dakorduar që ne do të jua bëjmë zgjidhjen gjithë secilit. E lehtë nuk është, sepse kanë kaluar listat është bërë vlerësimi dhe prap rivlerësimi i dokumentacionit shtesë për tu kompensuar. Mirëpo kryetar, na do të mundohemi ne që ta bëjmë kompensimin e tyre duke mos i kaluar formalitetet ligjore.

Kryetari i Komunës z. Bedri Hamza: Po është situata e qartë, domethënë e krijojmë një komision ose komisionin paraprak, vjen me listë të verifikuar. Nuk është qëllimi askujt që me e shti dikën që me u kompensua nëse s'ka pësua dëmtime, po nuk është qëllimi as i asamblesë as i joni që me mbet dikush i pa kompensuar, nëse ka qenë i dëmtuar. Prandaj, komisioni do ta bën verifikimin e atyre që pretendohen se kanë qenë të dëmtuar dhe nuk janë kompensua, dhe pastaj prej Drejtorisë për Mirëqenie Sociale do të bëhet kompensimi i gjithë atyre familjeve, të cilat potencialisht janë dëmtuar, po nuk janë kompensuar.

Hysen Muzliukaj: Tema është nëse po kuptoj kështu, 200 familje janë votuar për të ju dalë në ndihmë me nga 2.500€. Në seancën e fundit e kemi pas një raport të kryetarit, raportin financiar që s'u përshtatke pagesa e këtyre familjeve a kemi të bëjmë me ato familje, që kanë qenë në këtë listë e nuk janë paguar. Pra mua më intereson drejtor a kemi të bëjmë me këto familje që kanë qenë në listë e nuk janë paguar dhe nëse është ashtu ne kemi votuar një listë në kuvend që kanë qenë familjet. Edhe keni pru një raport vlerësimi të dëmeve. Çka ka ndodhë tash çka ndryshua tek ky raport i vlerësimit? Nëse ju vetë si komision, e keni bërë vlerësimin e atyre të dëmeve, pse s'janë pagua nëse veç janë ardhur këtu në kuvend dhe janë vlerësuar që janë dëmet. Tash edhe nuk di çka do të themi se gjendja në teren ka ndryshuar nuk mundemi me than se pas një viti gjendja është e njëjtë, por ju e keni pru vetë këtë raport, jo na.

Kryetari i Komunës z. Bedri Hamza: Familjet, të cilat kanë qenë pjesë e evidencës së raportit, janë kompensua nuk është numri 200 është numri më pak se 200 familje të cilat janë kompensuar. Mirëpo z. Muzliukaj janë disa familje, nuk është numri i madh i tyre, në Iliridë e në Bair për të cilat unë tash po dua të besoj që për arsye shumë objektive, ndoshta edhe çështje të kujdesit të komisionit, të vetë familjeve, që kanë ngelë të pa kompensuar, që është shumë e saktë, a shumë evidente, se nuk mundet një fqinj në mes dy familjeve tjera me qenë dhe ata me qenë të vërsuar e ky në mes jo. Prandaj, le të vijmë me një raport, le të vijmë këtu në Kuvend e diskutojmë nëse të gjithë pajtohemi që ky është realiteti, na morëm vendim edhe e kompensojmë. Për pa u siguruar që ka ndodhë dëmi e familja nuk është kompensua, unë sigurisht se jam që kjo punë mos me ndodhë edhe mos me ndodhë kompensimi. Me ndodhë verifikimi, me ndodhë sqarimi i detajshëm pse ka ndodhë që nuk janë përfshi, kur sigurohemi që gjithçka është në rregull, gjithçka është korrekte, atëherë e morëm vendimin për me i kompensua.

Ekrem Sadiku: Shqetësimi im është për ato familje, të cilat kanë bërë kërkesë dhe ka shku komisioni, i ka verifikuar dhe konstatuar dëmet, vlerën e dëmit, pra nuk jemi duke folur për familjet të cilat nuk kanë bërë kërkesë dhe tek të cilat nuk ka shkuar komisioni. Informatat i kam sepse kam pasur kontakt me pjesën dërmuese dhe kemi diskutuar dhe kjo është çka ata më kanë thënë.

Kryesuesja znj. Vesa Broja: Është e qartë, po besoj që është dhe nuk është çështja që a u kon komisioni, a s'u kon. Çështja është që nuk janë kompensua edhe me ja mundësua kompensimin. Dhe për këtë do ta bëjnë një raport të ri, raporti do të silltet në Kuvend dhe Kuvendi do të vendosë për ndihmën tjetër financiare.

Elidiana Budini-Haziri: Dua të trajtoj një çështje që nëse ka mundësi mundet të futet si pikë të rendit të ditës, ose thjesht ka nevojë për me u diskutua në prani të kryetarit. E dimë që kontrata kolektive e mësimdhënësve ka sjellë obligime për të gjitha komunat, me apo pa dëshirën e tyre. E dimë që nënshkruesit e kontratës ka qenë sindikata e arsimit edhe qeveria, por që komunat pa dashjen e tyre duhet me i mbajtur obligimet financiare. Po ashtu, na është thënë prej avokatëve përfaqësues të mësimdhënësve që është një parakontratë, të paktën që diskutohet ndërmjet komunës dhe avokatëve përfaqësues të mësimdhënësve që obligimet komuna do t'i kryejë pa shku nëpër procedura ligjore dhe pa e futur ndërmjet përmbartuesin. Sipas një matematike thjeshtë, i bie që ato pare nuk janë të destinuara, ne duhet t'i marrim diku në ndonjë kod tjetër buxhetor. Pyetja ime është a ekziston vërtet një kontratë marrëveshje ndërmjet avokatëve dhe komunës? Nëse ekziston, ku do të merren ato mjete financiare për t'i kompensuar këta mësimdhënës, sepse shuma sigurisht është e madhe. E nëse nuk është një kontratë e tillë, atëherë bie që duhet përsëri me vazhdo me procedura ligjore dhe përmbartuesit duhet me marrë pjesën e tyre që i takon. Mendoj se është diçka shqetësuese për të gjithë mësimdhënësit dhe është një numër i konsiderueshëm, prandaj po e nxjerr edhe si shqetësim, ose trajtojeni si pikë të rendit të ditës, ose si sqarim qysh të do.

Kryetari i Komunës z. Bedri Hamza: Të them të drejtën Komunat, një pjesë si rezultat i këtyre kontratave, për mu sa i përket aspektit ligjor, gjithmonë kanë qenë dhe vazhdojnë të jenë të dyshimta, sepse çdo dokument, i cili ka ndikim buxhetor, duhet me pas deklaraten edhe vlerësimin

për ndikimin buxhetor. As që shqetësohem se kush i ka nënshkruar, kushdo qoftë dhe i cilës do parti politike që ka qenë, po. i ka nënshkruar niveli qendror, mirëpo faktikisht po del që ka prodhuar obligim për nivelin lokal, për komunat dhe nuk po flasim për shumat e vogla, por po flasim për miliona, vetëm prej se e kam filluar këtë mandat. E le tjerat! Kurrë s'po kanë mbarim, veç po vijnë herë për një arsye, herë për një arsye tjetër edhe po e ndikojnë buxhetin, po e ndikojnë edhe strukturën e buxhetit, sepse nuk mundën me i planifikua te pagat, sepse kur e merr qarkoren buxhetore, ty të vijnë edhe kufijtë dhe nuk mundesh me planifikua më shumë të pagat sesa që t'i ka dërgu MF-ja. Është një obligim që realisht nëse nuk arrijmë me e shmang koston e procedurave gjyqësore mundet me i tejkalua pesë milionë euro. Qëllimi është që të paktën me i shmang procedurat përbarimore dhe koston përbarimore, ndërsa njerëzit, në këtë rast personeli arsimor me u kompensuar. Prapëseprapë duhet me shku me procedurë gjyqësore me marrëveshje, përndryshe nuk mundën me hy në listë të pagave pa e pasur një vendim. se s'është pagë e rregullt, është pagë që kalohet përmes procedurave gjyqësore. Jemi të interesuar me përfundua këtë sa më shpejt, pra jemi të interesuar që këtë kompensim me e përmbush brenda këtij viti fiskal. Qëllimi ka qenë që pjesa e parë të përfundohet gjatë muajit mars, a do të arrijmë mbetet me pa, po kjo është objektivi, këto janë afatet dhe pjesën tjetër qysh kemi negociuar domethënë ka pjesa e dytë e vitit. Përndryshe, ky është obligim, në një mënyrë a në tjetrën njerëzit kanë me i marrë kompensimet e tyre, mirëpo nëse s'shkon në grup, ata disa kanë me i marrë sivjet, disa vitin e ardhshëm dhe disa në vitet vijuese, se nuk mundën që të gjithë përnjëherë me ardh në rend në gjykatë edhe kosto ka me u rritë, po edhe arsimtarët kanë me i marrë paratë e tyre me vonesë. Prandaj, është mirë për personelin arsimor që me i marrë këtë vit pjesën e atyre që u takon, për Komunën është tepër mirë me i zvogëluar shpenzimet e përbarimit edhe të avokatëve dhe sigurisht se ka me ndiku edhe strukturën e buxhetit, se një pjesë e tyre ndoshta arrin me u zbatua dhe ekzekutu prej pozicionit të pagave, por është e mundshme që ndërhyt edhe te pjesa e investimeve kapitale edhe t'i sakrifikon disa projekte, sigurisht ku është urdhër përbarimor, thesari veç të pyet, a po më tregon ku me t'i marr mjetet, nëse ti nuk i përgjigjesh, i merr vetë. Kështu që kjo është situata profesionale. Unë e kuptoj është e drejtë ligjore e keni fituar këtë të drejtë. Kur e kanë nënshkruar kontratën është deshtë me qenë ata që me e mbulua edhe koston, mirëpo nuk ka ndodhë, keni pritë me vite dhe unë jam duke punuar dhe jam shumë ithtar e përkrahës i asaj që sa më shpejtë të kryhet ky obligim, përndryshe Komuna e ka në derë! Është e pashmangshme.

Kushtrim Zeneli: Meqenëse muaji Mars njihet si muaj i nënave dhe vajzave atëherë unë kam një propozim për gratë dhe vajzat ose më mirë me thënë për Nënën vetë-ushqyese, Propozimi im konkret është subvencionimi me çerdhen private dhe lirim nga pagesa në çerdhen publike për nënat vetë-ushqyese. Pra, nuk mundem me vazhdua me qenë spektatorë në sfidat e grave dhe sidomos ndaj grave që kanë dhunë në familje dhe nënave vetë-ushqyese.

Kryetari i Komunës z. Bedri Hamza: Sigurisht se kanë nevojë për përkrahje kjo kategori, po për me ndodhë kjo, na duhet me pas disa elemente. Ne duhet të dimë se sa është numri i tyre, sa është numri i fëmijëve, sa prej tyre shkojnë në çerdhe publike, sa në çerdhe private, sa është kostoja totale e kësaj pune dhe duhet me e pritë vitin e ardhshëm buxhetor që me bë pjesë buxhetit. Përndryshe, në konsideratë po e marrim, për procedurat e ardhshme, sepse tash ne mundemi me marrë vendim, por për me ekzekutua nuk kemi ku me i ekzekutua, sepse nuk janë të ndara mjetet për këtë destinim. Pra për procedurat e ardhshme dhe për vitet e ardhshme buxhetore, kur te dimë koston e shohim mundësinë, se edhe unë po ashtu jam ithtar i asaj që realisht të gjitha ato nëna, të cilat kujdesen për fëmijët e tyre dhe është barrë e madhe me i rritë fëmijët vetëm jam i interesuar me diskutua dhe me pas konsideratë. Mirëpo është mirë, jo vetëm me thënë "po e bëjmë këtë" pa i ditë këto elemente.

Drita Kadriu: Veç se për informim për z. Zeneli, që Udhëzimi për çerdhet publike i ka të rregulluara lirimet nga pagesa për disa kategori, ku në ato kategori bëjnë pjesë edhe nënat vetëushqyese.

Kryetari i Komunës z. Bedri Hamza: Atëherë në bazë të sqarimit që na e dha drejtoresha po kuptohet që do ta kemi më të lehtë, për shkak se realisht është ardhë edhe fundi me u përfundua edhe po besoj që në shtator me fillua edhe Çerdhen në Shipol edhe ndërtimin buxhet që keni votua janë ndërtimi i disa çerdheve dhe kjo e lehtëson, koston edhe për komunën edhe është diçka e përballueshme.

Kushtrim Zeneli: Atëherë a mundemi për në seancën e ardhshme me na e sjell një raport, se sigurisht këto të dhëna që u theksuan drejtoria e Mirëqenies Sociale me pas një raport sa më të saktë për nënat vetushqyese, gratë e fëmijët.

Erseka Barani: Unë kam një propozim konkret, të gjithë jemi dëshmitarë se sa është rritë numri i rasteve të kësaj dukurie negative të dhunës në familje. Ky propozim që dua të bëj, faktikisht ka pikërisht të bëj me viktimat e dhunës në familje që lehtësisht janë të evidentueshme edhe nga Drejtoria e Mirëqenies Sociale. Ato viktimat janë në objektin e “Raba Voca”, objekt i cili nuk i përmbush as kriteret esenciale për një jetesë, duke e ditë që viktimat e dhunës shkojnë aty bashkë me fëmijët e tyre dhe jo të vetme, kështu që mendoj që ju duhen kushte më të favorshme, që ata fëmijë të paktën ta kenë atë përjetim më të lehtë. Kërkoj nga ju dhe nga ekzekutivi, po ashtu kërkoj mbështetjen nga gjithë asamblistët që këto raste viktimat e dhunës në familje, meqenëse jemi edhe para kalimit të të hyrave vetanake të vitit të kaluar, lehtësisht mund të kemi një evidencë dhe t'i përkrahim ato viktimat të dhunës në familje me pagesë të qerasë. Kjo nuk besoj që do ta rëndonte buxhetin e komunës me të vetmin fakt se ato janë aty për një periudhë të shkurtë dhe jo për një periudhë të gjatë, derisa të bëjmë zgjidhje të përhershme. Kështu që mendoj që në bazë të statistikave dhe lehtësisht është një mekanizëm në kuadër të komunës që e dinë saktësisht se sa viktimat janë, ku përfshihen edhe policia, përfshihet drejtoria e arsimit, drejtoria e Shëndetësisë edhe kabineti i kryetarit. Kështu që mendoj se para se të bëhet kjo, të ndahet një shumë dhe ta dimë për afërsisht një numër nga drejtoria e MS se sa viktimat të dhunës në familje janë dhe mendoj që lehtësimi i kësaj gjendje, të paktën në këtë aspekt, do të lehtësonte shumë jetesën e atyre grave, atyre viktimave dhe fëmijëve të cilët e kanë me të vërtetë nevojë edhe për përkrahjen nga niveli komunal.

Kryetari Komunës z. Bedri Hamza: Besoj se jeni në dijeni se jemi tu e ndërtua objektin e ri për këtë qëllim dhe besoj që gjatë këtij viti do të jetë në funksion. Besoj që jemi në mesin e komunave të pakta për shkak se ka qenë domosdoshmëri ndërtimi i këtij objekti, siç e potencuat edhe ju për mungesë të kushteve, është edhe goxha e rrezikshme, aty do të jemi i kujdesshëm në formulim aty rrinë bashkë persona të natyrave të ndryshme në të njëjtin objekt dhe kanë ndikim negativ te vajzat dhe djemtë e ri, të cilët, bashkë me nënat ndodhen në atë objekt. Po besoj që këtë vit ky objekt do të përfundon dhe do të ofron kushte korrekte. Sa unë jam në informacion, po besoj që në seancën e ardhshme mundemi me ardh edhe ma saktë na veç i ndihmojmë përmes DMS-së dhe gjithmonë jemi në mbështetje të kësaj kategorie të rrezikuar dhe mjaft të ndjeshme. Po mbi të gjitha është tepër e rëndësishëm që sa më shpejt përfundohet objekti dhe këto t'i kenë kushtet dhe trajtimin në përputhje me standardet.

Erseka Barani: A ka mundësi se derisa të përfundohet objekti, të paktën ato që janë tani edhe shpresoj që të mos ketë më dhe të jenë të fundit, të paktën të ketë përkrahje nga komuna për ato derisa të përfundohet objekti. Kryetari e ceku shumë mirë, aty me të vërtetë janë kategori të ndryshme dhe është regjionale, nuk është vetëm e Komunës së Mitrovicës, kështu kemi edhe nga qytete të tjera që vijnë, ndihen të kërcënuara çdo ditë, ndoshta edhe nga dhunuesit, të cilët shkojnë aty në atë objekt. Kështu që mendoj që të paktën një trajtim më të dinjitetshëm edhe një ndihmesë. Unë e di që komuna e Mitrovicës i përkrahë vazhdimisht mirëpo me pagesë të qerasë është një ndihmë konkrete, e cila do t'i ndihmonte jashtëzakonisht shumë viktimat e dhunës në familje konkretisht fëmijët e të cilët e përjetojnë rëndë atë pjesë.

Kryesuesja znj. Vesa Broja: Po besoj që mundemi me u marrë edhe me evidentimin e numrit, të familjeve në fjalë që po diskutojmë edhe pastaj bashkë me Drejtoreshën e Mirëqenies, më i marr

edhe të dhënat konkrete se a ndihmohen në këtë aspekt. Po ashtu edhe unë kam informacionin që familjet që vijnë dhe kanë nevojë për mbështetje për qera, DMS i ndihmon edhe tash, po pasi që nuk është drejtoresha këtu, nuk po mundemi me thënë asgjë për të dhëna të sakta. Kështu që po besoj që është mirë me e lënë deri seancën e ardhshme, të diskutojmë edhe bashkërisht me drejtoreshën, edhe pastaj të vijmë me një propozim konkret, nëse është e nevojshme.

Hysen Muzliukaj: Më intereson të di se a është bërë ndonjë gabim për muajin Janar, ose për muajin Shkurt. Në muajin Janar, me sa e di, s'kena mbajtur mbledhje të KPF-së por na është bërë pagesa e shtesës, ndërsa në muajin Shkurt mbledhje kemi mbajtur por pagesa nuk është bërë. Më intereson të di pse ka ndodhur kjo sepse unë mendoj që nuk është në rregull, se dalim keq tek ndonjë raporti i auditimit.

Kryesuesja Vesa Broja: Sa i përket listës për pagesa, lista prej Sekretarisë së Kuvendit, e cila nënshkruhet nga unë, në muajin Janar ka shkuar pa mëditje të KPF-së, ndërkaq Ministria i ka kompensua ato. Muajin shkurt lista ka shkuar me mëditje për mbledhjen që është mbajtur të KPF-së, ndërsa ata e kanë bërë barazimin atje edhe nuk e kanë qitë për shkak se janë marrë në muajin Janar. Edhe e kanë qitë veç diferencën që prej Janarit është dashtë me rritje 110 koeficienti, ndërsa në Janar i kanë qitë më të vitit të kaluar, atë diferencë e kanë qitë muajin Shkurt.

Vesel Neziri: Fillimisht i uroj të gjithë besimtarëve muajin e Ramazanit. Është muaj kur i pasur dhe i varfër janë të barabartë. Kisha pas dëshirë që shumë herë ligjet nga Evropa po i marrim dhe po i adoptojmë, andaj kisha pas dëshirë që modelin e Frankfurtit dhe modelin e Londrës, ta ndjekim që në vitin tjetër në muajin e ardhshëm të Ramazanit, që edhe qyteti i Mitrovicës të zbkurohet, për muajin e shenjtë Ramazanit.

Kryesuesja znj. Vesa Broja: Atëherë, për pikat e propozuara u dakorduam se kur të na vijnë në kuvend, kështu që po vazhdojmë me miratim të rendit të ditës me ndryshimin që pika e dytë e rendit të ditës të jetë Plani i punës së Kryetarit të Komunës për vitin 2024, ndërsa pika e katërt vazhdoi Plani komunal për shërbime sociale në komunën e Mitrovicës.

Kryesuesja në vazhdim vuri në votim këtë rend dite:

1. Miratimi i procesverbaleve nga dy mbledhjet e kaluara
2. Plani i punës së Kryetarit të Komunës për vitin 2024
3. Projekt-Plani i veprimit për parandalimin e braktisjes dhe mosregjistrimit të shkollës 2024-2026
4. Projekt-Plani komunal për shërbime sociale në Komunën e Mitrovicës së Jugut
5. Kërkesa e Sindikatës së të Punësuarve në Komunën e Mitrovicës për mbështetje financiare
6. Raport i punës së Drejtorisë për Shëndetësi për periudhën janar-dhjetor 2023
7. Pyetje dhe përgjigje

Rezultati i votimit 28 për, 0 kundër dhe 0 abstenime.

Rendi i ditës u miratua unanimisht.

Pika 1

Kryesuesja hap diskutimin për dy procesverbalet nga mbledhjet e kaluar.

Meqenëse nuk ka të lajmëruar për diskutim atëherë do ti hedh veçmas në votim.

Kryesuesja vuri në votim Procesverbalin e mbledhjes së njëzeteshtatë (27-të) të Kuvendit të Komunës dt. 31.01.2024.

Rezultati i votimit 28 për, 0 kundër dhe 0 abstenime.

Kryesuesja e konstatoi të miratuar unanimisht Procesverbalin e mbledhjes së njëzeteshtatë (27-të) të Kuvendit të Komunës dt. 31.01.2024.

Kryesuesja vuri në votim Procesverbali i mbledhjes së njëzetetë (solemne) të Kuvendit të Komunës dt. 17.02.2024.

Rezultati i votimit 27 për, 0 kundër dhe 0 abstenime.

Kryesuesja e konstatoi të miratuar unanimisht Procesverbalin e mbledhjes së njëzetetë (solemne) të Kuvendit të Komunës dt. 17.02.2024.

Pika 2

Kryesuesja hapi diskutimin lidhur me Plani i punës së Kryetarit të Komunës për vitin 2024, hap diskutimin.

Xhyljeta Imeri: Tek plani i Kryetarit do të ndalem në disa projekte të shkurtra. Në këtë plan kishte shumë prioritete si rregullimi i disa shkollave, ndërtimi i rrugëve e të tjera, por u befasova si nuk është paraqitur si prioritet vazhdimi i ndërtimit të Çerdhes së fëmijëve në Shipol, ku ndërtimi i saj ka filluar në vitin 2020, si dhe mjetet për staf janë të planifikuara për këtë vit, kurse çerdhet të cilat as nuk kanë filluar fare janë prioritet. Gjithashtu, ndërtimi i aneksit të shkollës “Aziz Sylejmani” paralele e ndarë në Suhodoll ku janë planifikuar 40.000€, nuk është prioritet. Ndoshta emërtimi si aneks i objektit nuk duket i rëndësishëm, por këtu bëhet fjalë për ndërtimin e një klase. Hapësira ekzistuese në të cilën zhvillohet mësimi nuk i plotëson kushtet për mësim. Është një hapësirë e improvizuar në formë trekëndëshi. Mund të themi që edhe kotecet e shpezëve janë më të mëdhenj se kjo klasë. Kështu që kërkoj nga ju kryetar, që këto dy objekte të jenë prioritet i yt për këtë vit që në shtator të funksionalizohet çerdhja për fëmijë në Shipol dhe të ndërtohet kjo klasë për fëmijët të cilët duhet të ketë një ambient më të mirë dhe që i plotëson kushtet për mësim. Po ashtu edhe shuma prej 20.00€ për kabinete, për të gjitha shkollat e qytetit, është një shumë mjaft e vogël dhe kërkoj nga ju që me bartjen e të hyrave vetanake të rritet sadopak kjo shumë.

Kryetari i Komunës z. Bedri Hamza: Me shumë të drejtë, po nuk do të thotë që në plan të punës nuk janë paraqitë që s'kanë me ndodhë, nëse janë pjesë e buxhetit, se në plan të punës mundemi me i paraqitë por nëse s'e kemi buxhetin, është pak më vështirë me u realizua. Kur janë në buxhet, mos me kanë plan të punës, ka mundësi me u realizua. Prandaj, kanë qenë projekte të cilat i kemi diskutua dhe dimë rëndësinë e tyre. E të them të drejtën, kjo Çerdhe e Shipolit është stërzgjatë, e për befasinë time, kur i kemi shpallë procedurat, e kemi shpall me një shumë, por kur i kam pyet inxhinierët, thashë: Pse bre? Më thanë se i kemi harru do pajisje, me i bë pjesë projektit. Ato pajisje e kishim vlerën gati sa krejt projekti. Mirëpo jam i bindur që deri në shtator dhe jam optimist që kjo do të jetë në funksion të përdorimit nga prindërit që janë pjesë e atij lokaliteti. Gjithashtu edhe për aneksin e shkollës në Suhodoll, për shkak se ju keni ngritë, ju keni propozuar dhe e dini gjendjen ma së miri aty, besoj që edhe e njëjta do të realizohet. Dhe krejt në fund, sa i përket kabineteve, zakonisht janë furnizuar prej mallrave dhe shërbimeve dhe kur është furnizim prej mallrave dhe shërbimeve, nuk është specifikisht e lidhur shuma, po ka mundësi që shuma e planifikuar të rritet më tepër dhe të bëhet pagesa. Me qenë projekt kapital, ti duhet me pas shumë për me dhënë për disponueshmëri, ndërsa të mallrat dhe shërbimet mundet me u tejkalua shuma prej 20.00€ dhe me u bë edhe më e lartë, varësisht prej nevojave dhe çka duan me ble.

Pasi nuk kishte të lajmëruar për diskutim Kryesuesja vuri në votim Planin e punës së Kryetarit të Komunës për vitin 2024.

Rezultati i votimit 27 për, 0 kundër dhe 0 abstenime.

Kryesuesja e konstatoi të miratuar unanimisht Plani e punës së Kryetarit të Komunës për vitin 2024.

Pika 3

Kryesuesja lidhur me Projekt-Planin e veprimit për parandalimin e braktisjes dhe mos regjistrimit të shkollës 2024-2026, për ta sqaruar fjalën ia kaloi drejtoreshës znj, Drita Kadriu.

Drita Kadriu në pika të shkurta e sqaroi Projekt-Planin e veprimit për parandalimin e braktisjes dhe mos regjistrimit të shkollës 2024-2026.

Kryesuesja e hap diskutimin.

Xhyljeta Imeri: Ju përgëzoj që edhe Komuna jonë po e përmbush obligimin për Plan të Veprimit për Parandalimin e Braktisjes dhe mosregjistrimit të shkollës 2024-2026. Uroj që sa më parë t'i krijoni ekipet në komunë dhe në shkolla për parandalimin e braktisjes së shkollës nga fëmijët dhe të keni suksese. Arsimi duhet të është Strategji Kombëtare në praktikë e jo vetëm në letër, mësimi të bëhet gjithditor, të krijohen kushte më të mira për nxënësit dhe mësimdhënësit, të kenë një kohë të caktuar gjatë mësimi, ku mund të zgjedhin aktivitete sportive, art, lexim. Gjithashtu plan programet të bëhen adekuate për moshën e tyre, jo të jenë të mërzitshme për fëmijët dhe jo të papërceptueshme për ta. Unë mendoj që shkolla duhet të jetë një ambient i ngrohtë që fëmijën e bënë të lumtur. Kemi faktor të ndryshëm që ndikojnë në braktisjen e shkollës nga fëmijët disa nga ta janë: Vijueshmëria jo e rregullt në shkollë; Ngacmimi nga bashkëmoshatarët; Problemet e ndryshme në familje; Problemet sociale e të tjera.

Por këtu mësimdhënësit janë të parët që mund t'i identifikojnë fëmijët që janë në rrezik të braktisjes së shkollës. Mirëpo lidhjet e mira prindër mësimdhënë, bashkëveprimi i tyre rrit mundësinë si në zhvillimin e diturive ashtu edhe në zhvillimin social. Por në parandalimin e braktisjes së shkollës nga fëmijët, dhunës, ngacmimit do të na ndihmonin psikologët në shkolla. Kërkoj nga Kryetari, Drejtorja e arsimit dhe ajo e financave t'i mbledhin forcat dhe të shpallin konkurs për psikolog në shkolla sepse janë shumë të nevojshëm.

Fadil Veseli: Meqenëse Drejtoresha e ceku arsyen dhe peshën që ka ky plan, unë vetëm në pikat shkurtra po i numëroj disa që u përfshin edhe në fjalimin e drejtoreshës, siç është domethënë gjatë hartimit të komisionit që ka hartuar këtë plan, vërehet se ka mungesa të shumta të nxënësve, e sidomos në shkollën e mesme dhe ato kryesisht profesionale. Braktisja e shkollës gjatë tri viteve të fundit, të shihet në total nuk është për t'u shqetësuar shumë, me thënë drejtën. Unë rastësisht një ditë e dëgjova një lajm nga deutsche eelle që tha Gjermania brenda vitet kanë braktisë shkollën 45.000 nxënës. Mirëpo çka më shtyri më së tepërmi të marr fjalën, është çështja se tash e dy herë mbahet testi PISA në nivel kombëtar, herën e parë menduam që në njëfarë forme nuk është aq serioze dhe nuk i dhamë rëndësi, dhe doli rezultati shumë i dobët. Kurse herën e dytë jo të ketë përmirësim të rezultatit por edhe më i dobët. Edhe ne si kuvendar kemi një lloj përgjegjësie dhe defekti më i madh i kësaj është se askush s'merret me këtë çështje. Krejt është e arsyeshme çështja e mungesës së përjashtimit të nxënësve, mirëpo kjo është veç njëfarë degëze e vogël. Përgjegjësia është prej Presidencës deri te nxënësi, kemi përgjegjësi edhe ne si Kuvendar kemi përgjegjësinë tonë, pse jemi kaq të dobët. Dhe nuk është ajo organizatë e thjeshtë, që të themi hajde veç e kanë bërë vlerësimin, por një organizatë ndërkombëtare që ka peshë dhe është serioze. Kemi dal aq dobët dhe mos të merret askush me atë, është pak një pikëpyetje shumë e madhe.

Hysen Muzliukaj: Pajtohem me z. Veseli po ne duhet me u merr se çka nuk është duke funksionu arsimi mirë në nivel lokal. Edhe testi PISA nuk është që po mbahet vetëm vitin e kaluar, por është qe dy vitet e fundit por edhe më përpara. Sa i përket këtij plani, unë i kam dhënë vërejtjet e mia edhe në KPF, se p.sh. kur i pash shifrat që 3.500€ broshura. Unë po propozoj nëse ka mundësi, që në këtë plan nuk është ideja veçse mos me u shpenzu mjetet, por kështu mjete me shku tek nxënësit që këto broshura me i punuar nxënësit vet. Me bër një lloj konkursi brenda shkollës, njëfarë gare shkollore, që këto broshurat të punohen në qoftë edhe në letër të bardhë me vizatimet tyre, me shkrimet tyre, po me punu për sensibilizim. Le të jenë njëfarë stimulimi për nxënësit dhe bëhet njëfarë praktike në të gjitha shkollat. Pastaj, 8.500 ke vizita për nxënësit e klasave të gjashtë dhe shtata, nuk është se jam kundër vizitave, se e vërteta është se sa më shumë se dalin dhe shohin

e bëjnë. Ideja ime ka qenë tek infrastruktura në arsim, atë ditë kur u kanë tema në KPF. Drejtoreshë, a kemi mundësi në këtë plan me inkuadru, se tash pothuajse infrastrukturë më shumë se tash që kemi, s'kemi pas asnjëherë, këto palestra që i kemi, përveç orarit mësimor, a kemi mundësi me gjet një metodë që me i lejua të shtunave dhe të dielave për komunitetin dhe nxënësit e komunitetit që jetojnë aty. Me bë gara, ushtrime, çfarëdolloj sporti, qoftë mënyrën qysh e gjeni, jam në gjendjen ashtu edhe me ju ndihmua në këtë aspekt. Një plan, një orar, kërkesat e prindërve e nxënësve, në mënyrë që nga ora nëntë apo dhjetë, të shtunave dhe të dielave, se edhe ashtu mirëmbajtësit teknik kanë me mbajt orarin të punës. Kjo infrastrukturë, realisht po na vdes, në momentin që nuk shfrytëzohet ajo bëhet më e dëmtuar se sa kur shfrytëzohet. Pra këto palestra, do të thotë ato çka i kemi si p. sh shkollën e muzikës dhe të gjitha objektet, që nxënësit mos ta kenë veç orarin mësimor obligativ që me qenë në ato. Kjo kish me bo vullnetin e motivin dhe me gjet edhe metodën që as mirëmbajtësit teknik, mos me i lënë me u merr me atë pjesë atë ditë, që nxënësit kur të jenë aty apo prindërit kur të vijnë me fëmijët me e kthye në gjendjen e mëparshme siç ka qenë objekti në ato pjesë ku ata e kanë shfrytëzuar.

Flutura Beka Kamberaj: Në këtë plan janë paraparë disa objektiva për parandalim të braktisjes së shkollës, mirëpo përveç tek objektivi 1.1 dhe 1.2 ku treguesit janë kuantitativ dhe janë të kostuara, dihet sa nxënës, sa bursa, objektivat e tjera specifike treguesit nuk janë kuantitativ, nuk janë të caktuara p.sh. Numri i panairëve, numri i shkollave, numri i nxënësve pjesëmarrës etj, Në bazë të këtij plani nuk e dimë çfarë rezultate do të arrihen në periudhën 2024-2026 sipas planit. Objektivat janë të kostuara dhe përgjegjës kryesor është komuna, ka institucione mbështetëse por nuk dihet ato a kanë obligime financiare në realizim të këtij plani, andaj kjo shumë prej 81,620€, a është në harmoni me buxhetin e komunës. Plani i veprimit për parandalimin e braktisjes dhe mos regjistrimit në shkollë, tregon statistika të braktisjes së shkollave, dhe objektivat për parandalim të braktisjes mirëpo në plan nuk pash ndonjë statistikë të fëmijëve të mos regjistruar në shkollë, a keni ndonjë të dhënë sa i përket kësaj pjese të planit dhe objektiva konkrete për ta.

Nafije Rexha: Sa i përket çështjes së projektit të planit të veprimit për parandalimin e braktisjes dhe mos regjistrimit të shkollës d.m.th vlen të përgëzohet plani i veprimit nga Drejtoresha e Arsimit e cila e potencoj në pika të shkurtra, aktivitetet për format e punës, të cilat do të organizohen përmes objektivave dhe strategjive të punës. Dhe përderisa i takoj kësaj pjese të mësimdhënies, jam pjesë e kësaj kategorie vlen të theksohet se pikërisht edhe kjo është ndikim negativ në standardin dhe në testimin me testim PISA, siç e potencoi më herët edhe kolegu z. Veseli, sepse kur në shkollat tona ka mungesa të shumta të nxënësve dhe kur prindërit nuk janë shumë të interesuar që të punojnë me fëmijët e tyre, në mënyrë që të parandalojnë braktisjen e shkollave, automatikisht kjo reflekton edhe në cilësinë e mësimdhënies. Sepse pikërisht në mësimdhëniesit jemi ata të parët të cilët ballafaqohemi me plan-programin të cilin e bëjnë për vite të caktuara, sepse pikërisht me ata nxënës që mungojnë, atëherë ne jemi të obliguar që të mbajmë edhe mësim e plotësuese e që nuk është aspak e lehtë. E me vet faktin që tha sa po punohet në motivimin dhe me ngritjen e cilësisë e testit Pisa, pikërisht këtu duhet të referohemi nivelit qendror. Sa është duke bërë nivelin qendror për mësimdhëniesit në mënyrë që puna e tyre të kompensohet dhe të ketë një mësimdhënie më efektive. Pra, mësimdhëniesit duhet të kompensohen me punën e tyre, pra sa ju ka vlerësua puna atyre që pas lufta, derisa shumë sot janë në pension dhe nuk u është kompensuar puna që e kanë bërë. Deri sa mësimdhëniesit me çfarë nuk po ballafaqohen në ditët e sotme kur e dimë se fëmijët kanë filluar të merren edhe me mjete të ndryshme narkomane. Pra ne sot si shoqëri duhet së pari ta vetëdijësojmë këtë shoqëri që t'i vetëdijësojmë në rend të parë prindërit për edukimin e fëmijëve të tyre, pastaj të flasim me gojë të hapur dhe të marrim masa që mësimdhëniesit nuk janë të nivelit. Unë në bazë të përvojës sime 35 vjeçare e kam theksuar shpesh, se mësimdhëniesit janë të stërlodhur nga mosrespektimi, nga mos përmbushja e kushteve esenciale për ata, për të cilat ata kanë nevojë. Nuk po flasim për nivelin komunal, por për nivelin qendror që duhet t'i thërrasin mendjes dhe të ndahet buxheti i caktuara për sferën e arsimit nëse duam të kemi

një PISA të suksesshme. Çfarë po kontribuojmë? Një kërkesë për shkollën “Abdullah Shabani” e kemi bërë përmes deputetes znj. Ganimete Musliu, kërkesë të cilën e kam ngrit unë përmes paneleve të OSBE-së. Publikisht i them Armend Mujës dhe Arjeta Fejzës që duhet të jenë në nivelin e përgjegjësisë dhe ish dashtë që në prag të miratimit të buxhetit të përkrahet kërkesa për ndërtimin e ndërtesës së shkollës “Abdullah Shabani”, prej të cilës ka dalë kryeministri i parë i vendit Bajram Rexhepi. Kështu që për hir të kësaj dhe që kjo shkollë njihet në nivel të Kosovës është e përfshirë në kurrikulat e Kosovës. Për punën të cilën është bërë me vite të tëra, mësuesit të shtunave dhe të dielave kanë bërë trajnime çka do që ka ofruar nivelin qendror apo nivelin lokal, mësuesit ju kanë përgjigj çdo ftese. Kështu që, drejtoreshë, faleminderit shumë për këtë iniciativë të këtij plani të veprimit, ku edhe unë si pjesë e tij do ta jap kontributin tim, siç e kam dhënë në vitet e para, në gjenerata me nxënësit e mi që fatkeqësisht ndoshta e nuk mund të them se krejt mësuesit janë të përkryer por me ta le të merret inspektorati, janë rregullat, janë normat, kush nuk punon duhet të ndëshkohet. Nëse funksionalizohen këto, atëherë edhe cilësia në arsim ka me qenë ndryshe. Çdo herë e shoh që, sa herë e marr fjalën, për diskutimin për arsim, unë arsimin e kam pikë të dobët edhe ju kam afrua gati ndoshta edhe pensionit, por nuk jam aspak e kënaqur. Kështu që shpresoj dhe besoj që në një të ardhme do të do të do të trajtohem më të dinjitetshëm sepse në të vërtetë baza dhe shtylla e shtetit është pikërisht arsimi edhe prindër duhet t'i thërrasin mendjes dhe përgjegjësisë që ta kryejnë punën si duhet me fëmijët e tyre e mos t'i kërkojnë të gjitha nga mësuesit, sepse edukata merret në bazë.

Elidiana Budini Haziri: Unë po mendoj që pos që është obligim ligjor, plani i veprimit duhet të jetë edhe një obligim moral. Ne po e dimë që nataliteti vetëm ka rënë, statistikisht nataliteti ka rënë. Nga ana tjetër, po e dimë që me liberalizimin e vizave është edhe që familjet po shkojnë jashtë Kosovës, për çdo ditë numri i nxënësve është duke rënë. Qëllimi i këtij plani, me sa unë e kuptoj, duhet që të paktën ata nxënës që janë brenda komunës mos të jenë në rrugë por në shkollë. Ky plan thjesht na ofron mekanizma që të arrijmë nxënësin ta ofrojmë më pranë shkollës e mos ta lëmë të endet nëpër rrugë, për atë mendojë që është i nevojshëm dhe duhet të jetë obligim për secilin për ne ta votojmë.

Kushtrim Zeneli: Sa për sqarim për znj. Rexha se e ka cekë edhe herën e kaluar këtë çështjen e shkollës “Abdullah Shabani” dhe sigurisht se ne e kemi diskutuar edhe me deputetët tanë që i kemi pra Armend Mujën dhe Arjeta Fejzën, ata na kanë thënë që ne ju kemi drejtuar zyrtarisht me një email MASHT-it, ku kanë kërkuar që me u përfshi edhe ata kanë thënë që s'ka pas as kërkesë nga komuna edhe për këtë është e njoftuar edhe drejtoresha Drita Kadriu që i kanë thënë që me bërë zyrtarisht një kërkesë për shkollën “Abdullah Shabani”. Mundet drejtoresha me na e sqaruar. Ndërsa sa i përket në raportit, është përmend për nxënësit që udhëtojnë me mbi një kilometër, kjo ka filluar dhe me u bërë tepërt, unë e kuptoj që ndoshta mundemi me pas probleme me tenderë ose diçka, veçse me marrë kaq shumë kohë thujse po bëhet një muaj që nxënësit nuk kanë pas transport, ecin në këmbë rreth 5 km edhe në shumicën e rasteve po kanë edhe humbje të orëve, pra kjo ndikon edhe në braktisjen e shkollave. Pra kërkoj që të merret me urgjent transporti i nxënësve. Dhe ajo çka më intereson është se a ka dështuar projekti E-shkollori .

Vesel Neziri: Faktikisht raportet nuk na mungojnë, ligjet nuk na mungojnë, po kushtet dhe dëshira për mësim po mungon. Jam shumë i bindur që nxënësit tonë po t'i kishit pyet dhe të kishin pasur testin PISA se cilët janë VIP-at e degjenerimit, serialet televizive, futbollistët më të mirë, me siguri se me testin PISA do të ishim të parët. Çka dua me thanë me këtë? Na po merrem veç me mjekim dhe jo me parandalim. Mjekimi është i kushtueshëm. Meqenëse se mësuesit me e ngritë shqetësimin e vet, por ofertën hej. Çka ishte oferta e hej? Oferta Hej është që të gjithë nxënësit t'i largon prej shkollave, që tërë natën mund të bisedojnë pa pare dhe asnjëherë kush nuk e ngriti shqetësimin pse fëmijët e tyre ju ofruat një telefon, një numër falas dhe mundësi e bisedave tërë natën me fol pa pare. Në raport sigurisht që janë të evidentuara saktë krejt fëmijët që mungojnë, janë fëmijë me probleme familjare ose janë fëmijë të cilët kanë divorc mes veti

prindërit. Pra, shkatërrimi i familjes po vazhdon edhe më tutje, mungesa e një niveli global kombëtar për me ngritë vetëdijen mungon në librat tona, dashuria për shkollë mungon në familjet tona, sot kjo dashuri po mungon, kjo politikë po mungon dhe aq ma keq kur sot po kërkohet me të madhe që të lindin edhe fëmijët pa prind, që është absurdi më i madh dhe kjo shoqëri me këtë rrugë dhe me këtë rrugëtim po shkon drejt degjenerimit dhe shkatërrimit. Nuk janë të largëta rastet e serialeve ku bëjnë klonimin e njeriut, i fëmijëve dhe jo rastësisht kanë ndodhur ato, por kanë qenë si model që na të klonojmë fëmijë dhe të mos i dihet prindi. Në qoftë se vazhdohet kështu, kjo që po ndodh sot, është shumë pak çka do të ndodhë nesër, në qoftë se ne nuk përkujdesemi për rregullimin e çështjes në familjet tona.

Drita Kadriu: Ajo që është diskutu prej jush, normalisht janë eksperiencia, përvoja, nevoja që ju i shfaqni dhe janë shumë të mirëpritura për secilin. Mitrovica nuk ka kapacitete të infrastrukturës me organizua mësimin gjithë-ditor siç e përmendi deputetja, për shkak të ndërrimeve dhe numrit të madh të nxënësve në shkollat e qytetit. Ndërsa në shkollat e rretheve jemi duke e planifiku riorganizimin sipas Udhëzimit Administrativ që e ka aprovu Qeveria dhe besoj që ndoshta në katër vitet e ardhshme pas këtij mandati, ka me pas mundësi dikush me i vë një theks më të madh te këto çështje, sepse na lidhen edhe vendet e punës mësimdhënësve mandej në riorganizim. Besoj që mësimdhënësit e kanë marrë mesazhin gjatë hartimit të këtij plani që ta përfshijnë si tema ndërkurrikulare edhe çështjen e braktisjes dhe janë duke e zhvillu herë pas here në lëndët e tyre. Më shumë efekt në këtë plan kanë nxënësit të cilët janë problematikë dhe që vijnë prej familjeve problematike. Ne kemi pas një takim Drejtoreshën Regionale e Policisë, na ka thirr dhe kemi fillua aty me i adresua disa të dhëna të nxënësve që vijnë me një begrand të tillë, në mënyrë që t'i kemi të she njëzuar dhe të dimë afërsisht se gjatë procesit të shkollimit, po edhe pas çfarë po ndodh, jemi në procedura të hartimit të një forme tabelore jo shumë të koklavitur, po shumë lehtë të shfrytëzueshëm. Gjithashtu, ju njoftoj që ne kemi nda gjashtë pozita për psikologë dhe po besojmë që këto gjatë këtij viti kemi me i rekrutu për herë të parë Mitrovica tanimë e ka një psikolog në shkollën “Çajupi”. Kështu që jemi të lumtur që gradualisht kena fillu me adresu edhe këtë problem. Mungesat e nxënësve, kur i kemi analizu zoti Fadil, dalin më shumë mungesat e nxënësve të cilët lidhin marrëdhënie pune, fillojnë me punu, posaçërisht nxënësit e shkollës ekonomike, nxënësit e shkollës teknike. Dhe po mundohemi me gjet një mes të artë bashkë me shkollat, në mënyrë që nxënësit edhe ta vijojnë mësimin në oraret e tyre të rregullta, jo veç qysh e parasheh ligji për praktikat profesionale, por nxënësit, që vërtet kanë marrëdhënie pune ata atyre me ju krijua lehtësime me e viju shkollimin edhe janë duke e bërë shkollat ekonomike dhe ajo teknike. Nuk duan ndoshta shumë me u zgjat te testi PISA përgjegjësia e saj është prej lart deri te familja, po edhe prej familjes deri në krye. Sepse testi PISA nuk është diçka tjetër, përveç një qasje e re në metodologji të mësimdhënies dhe për me ndërrua qasjen e tridhjetë mijë mësimdhënësve duhen aftësi profesionale që duhet me i pas mësimdhënësit. Ne këtë vit e fillojmë trajnimin e vazhdojmë trajnimin e mësimdhënësve, por buxheti për trajnimin e mësimdhënësve kryesisht është i centralizuar në nivel ministrisë dhe nuk ka pas programe të akredituara deri para dy jave. Kështu që tash janë akreditu programet e trajnimit dhe ne do të vazhdojmë me procedurat e trajnimit. Nuk pres që testi PISA, edhe pas vlerësimit të ardhshëm ka me u avancu shumë, për shkak se duhet goxha disa vite me investua në këto ndryshimet në qasje të mësimdhënies e mandej me fillu me i pa rezultatet e para. Nëse dikush tenton ose mendon që me këtë temë ose mbërrin diçka qoftë politikisht, besoj që hiç nuk është temë e këndshme për asnjë palë në sistem, por është dashtë me investu goxha shumë në aftësim, se mësimdhënësit janë të përgatitur, kërkojnë informacione të reja. Plus mos harroni, mësimdhënësit e kanë mundësinë edhe me u vetë-arsimua. Na e dimë, gjyshërit tanë janë vetëarsimu, janë mësu me lexua. Tash mësimdhënësit kanë mundësi me u vetëtrajnu përmes platformave të ndryshme elektronike që janë online edhe këtë motiv ne i ndajmë çdo ditë me ta, po besoj që një klimë e bashkëpunimit edhe një dashuri me ju përgjigj aktiviteteve e kemi gjetur shumë të madhe tek mësimdhënësit. Deputet Hysen Muzliukaj, për atë që broshurat

kanë me u hartua prej nxënësve, ideja është jashtëzakonisht e madhe e mirë ka mundësi që ne me dediku në temë që broshurat në formë ose të vizatimeve e tjerë të bëhen nga nxënësit, po do të jemi dëshmitarë bashkërisht cilido prej juve si asambleistë dëshiron me marrë pjesë aty. Tek palestra sportive goxha është investuar në to. I kemi blerë edhe do pajisje që ju ndihmojnë teknikëve me i pastru janë shumë të rëndësishme, sepse po mbahet higjiena mirë. Momentalisht po shfrytëzojmë për shkak të Omni Sportit nga shumë klube sportive. Edhe ideja e shfrytëzimit të komunitetit është ide shumë e rëndësishme që besoj nëse veç zërthehet edhe problemi i Omni Sportit edhe shkollat lirohen që komuniteti me pas atë qasje. Kështu që jam mirënjohëse për propozimet edhe shumë falënderuese. Ky plan i veprimit sigurisht do të shoqërohet me aktivitete, të cilat lidhen drejtpërdrejt me shpenzimin. Deputetja Flutra, lidhen drejtpërdrejt me shpenzimet dhe ne jemi këtu mandej me i analizu e me i pa ku çka kemi shpenzua dhe sa. Deputeti Kushtrim, është problem transporti i nxënësve në lotin ku ka përfundu kontrata, kemi bërë përpjekje me adresu shumë shpejt e kemi adresu dhe do të bëjmë zgjedhje gjatë këtyre ditëve. Ne e kemi adresu e kemi bërë një zgjedhje afatshkurtër derisa ta bëjmë tenderin për transportin e përgjithshëm, që me një shtator na duhet me pas tenderin të vendosur në të gjitha pikat. Atë që po du me shtu, është pika të grumbulluese të nxënësve, sepse në terren ka dalë një pakënaqësi sa i përket mbledhjes së nxënësve, bashkë me komunitetin edhe me drejtorë shkollash do t'i përcaktojnë pikat ku transporti shkon, po normalisht se as transporti nuk mundet me shku te secila shtëpi se terreni shumë i hapur. Edhe një çështje tjetër, sigurisht kanë me na dalë informatat edhe ma të detajume, sepse po e analizojmë transportin, duhet me qenë ndoshta me kilometra, jo me ditë sepse raportimi në kilometra dhe ditë do të dallon, do të jetë shumë më i përfaqësues edhe më i saktë me kilometra. E-shkollori nuk ka dështu, ne kemi platformën të cilën janë duke e përdorë shkollat, vazhdimi i pilotimit të kësaj është në procedura të prokurimit edhe ne po presim që ata me i përfundu detyrat që duhet me i kry edhe me i shfrytëzuar. E di që kom informata, kryeministri ka bisedu me të gjitha palët që ofrojnë këto shërbime dhe janë tendenca me bërë një kornizë të përgjithshme për sistemin e menaxhimit të dhënave në arsimin para universitar. Ministria e Arsimit e ka një s-mija, por janë të dhëna veç teknike, po nuk e ka idenë e e kësaj çfarë po diskutohet në Qeveri edhe nëpër drejtoritë komunale. Unë po e shfrytëzoj rastin të gjithëve, veç e veç me ju falënderua për kontributin që po e jepni në dokumentet e arsimit, për frymën, pozitivitetin që po e jepni gjithandej nëpër mësimdhënës dhe besoj që bashkërisht kemi me dal më mirë. Edhe një informatë krejt në fund, presim me marrë raportin e projektit të shëndetësisë. Do t'ua sjellim edhe juve ndoshta në pikat kryesore, ku shëndeti i fëmijëve tonë është më i dëmtuar, që bashkërisht të gjejmë ndonjë zgjidhje dhe të ecim tutje. Faleminderit shumë secilit.

Xhylljeta Imeri: Vetëm desha me jua rikujtu, ndoshta e keni parë kur komentet e mia, këtij plani. që të bazohen në listat e vaksinimit, janë shumë të rëndësishme t'i verifikoni fëmijët të cilët nuk kanë arrit me u regjistruar në klasën e parë. Bazë në listat e vaksinimit është për secilën lagje, i kanë numrat e telefonit, gjenden adresat e tyre edhe janë pika shumë të mira referuese për me i evidentu fëmijët të cilët nuk janë regjistruar.

Drita Kadriu: Veç me ua sjell në kujtesë se problemi kryesor të mosregjistrimi në klasat e para është lagjia këtu buzë Ibrit te komuniteti rom, ashkalinj dhe egjiptian, ndërsa te shumica e popullsisë është rritë përfshirja, duke krijuar këto klasat e bashkëngjitura për fëmijë edukimin e fëmijërisë së hershme. Kemi bërë edhe një marrëveshje me Caritas-in që shpejt do t'i meremetojmë edhe pesë klasë të reja, edhe këto tri çerdhe që janë në plan sivjet, po besoj që e rritin përfshirjen e fëmijëve edhe e ngrisin kështu përgatitjen e tyre për regjistrimin në klasën e parë.

Flutura Beka Kamberaj: Drejtoreshë, meqenëse nuk kemi ndonjë statistikë të mos regjistrimit të shkollave të përfshira në plan, ndërsa titulli domethënë i komplet të planit është plani i veprimit për parandalim të shkollës dhe mos regjistrimi të shkollës. Ai është dashtë me u hekë kjo pjesë, se s'kemi as objektiva apo as statistika të fëmijëve, të cilët nuk janë të regjistruar nëpër shkolla. Në

fakt, komplet plani po thirret vetëm në veprime të parandalimit të braktisjes së shkollës. Në qoftë se nuk kemi të dhëna të sakta, bile së paku mos të jetë titulli i planit edhe pjesa tjetër.

Drita Kadriu: Plani nuk ka të bëjë me hyrjen e fëmijëve në shkollat në arsim. Momentalisht unë nuk i kam këto të dhëna, po qëllimi i planit është me parandalua braktisjen, nuk është i hyrjes së fëmijëve në klasë të para, por mundemi me i gjetë ato të dhëna, nuk është ndonjë problem. Mos regjistrimi është kryesisht për klasat e mesme. Është problemi i rritjes, përfshirjes në edukimin e hershëm, që përmend Gjyli. Ndërsa problemi është tej kalueshmëria prej klasës nëntë në të dhjetën, aty ka gjasa gjithmonë me u braktisë shkollën, po edhe gjatë shkollimit të mesëm që braktiset për shkaqe ekonomike e sociale. Po nganjëherë edhe klasa edhe shkolla nuk krijon klimë, mos me braktisë nuk duhet me u shty me ata të dobëtit, ata duhet me u integrua sa më shumë, ju duhen përgjegjësi.

Pasi nuk kishte të lajmëruar për diskutim Kryesuesja vuri në votim Planit të veprimit për parandalimin e braktisjes dhe mos regjistrimit të shkollës 2024-2026.

Rezultati i votimit 27 për, 0 kundër dhe 0 abstenime.

Kryesuesja e konstatoi të miratuar unanimisht Planit e veprimit për parandalimin e braktisjes dhe mos regjistrimit të shkollës 2024-2026.

Kryesuesja në mungesë të kuorumit mbledhjen e shpalli të mbyllur.

Mbledhja përfundoi punimet në ora 11:45 min.

Mitrovicë

Proçesmbajtës:


Atërdita MAXHUNI

Kryesuesja e Kuvendit


Vesa BROJA

